

Control da asistencia ás actividades presenciais – Xustificación de faltas.

Sistemas de avaliación

a) A asistencia a clase configúrase como un dereito/deber do estudantado, sendo a programación docente de cada materia a que determina e concreta a súa valoración e establece as actividades formativas obrigatorias.

b) O sistema de avaliación que se estableza na programación docente deberá respectar o disposto na memoria do título, e a asistencia a clase poderá ter a seguinte incidencia:

1. Valorarse como un factor máis na avaliación continua.
2. Ponderarse na cualificación final ou parcial, nunha porcentaxe previamente establecida.
3. Ser preceptiva para superar a materia ou para presentarse á realización de exames. Neste caso, na programación da materia deberase indicar a porcentaxe de presencialidade necesaria nas actividades docentes programadas e con anterioridade á realización das probas deberá publicarse un listado de estudantado que satisfaga este requisito para poder examinarse.
4. Non ter ningunha valoración.

c) As faltas de asistencia non poderán puntuar negativamente na nota da proba final de avaliación, pero si se poderán ter en conta na avaliación continua. En todo caso, de realizarse nas sesión de aula actividades que teñan algún tipo de ponderación na cualificación final da materia, o/a estudante que non asiste a elas por unha causa xustificada poderá compensar a súa ausencia na forma en que se determine polo profesorado da materia.

d) A falta de asistencia a actividades ordinarias que se realicen de forma síncrona fóra dos horarios establecidos para a materia non terán efectos na avaliación final, sen prexuízo das especificidades que se contemplen na programa docente.

Acreditación da asistencia a clase

a) O control de asistencia ás actividades programadas como obrigatorias deberá realizarse a través de soportes de carácter duradeiro.

b) Cando a programación docente da materia contemple no sistema de avaliación como elemento de valoración a asistencia a clase, cada profesor/a ou coordinador/a da materia deberá establecer o sistema de control a utilizar. As evidencias dos resultados dos controis de asistencia xunto co resto dos materiais obxecto de avaliación deberá conservarse ata a finalización do curso académico seguinte.

c) Para o control das prácticas de campo ou daquelas actividades que se realicen en instalación fora do centro empregárase o mesmo sistema.

d) A manipulación ou falsificación intencionada dos sistemas de control de asistencia, determinará a consideración de non asistencia á actividade e deberá ser comunicada á Reitoría para o inicio das actuacións disciplinarias que puidesen corresponder.

Xustificación das faltas de asistencia.

a) O estudantado poderá xustificar as faltas de asistencia ás actividades académicas en base as causas seguintes:

1. A realización de exames oficiais ou probas selectivas na Administración, xustificada mediante a acreditación do órgano avaliador.
2. A presenza en órganos colexiados universitarios internos, ou externos á USC cando se asista en representación do colectivo, acreditada mediante a correspondente convocatoria e certificación da secretaría do órgano.
3. O ingreso en centros hospitalarios e as consultas médicas no reprogramables, acreditadas con xustificante do centro médico ou facultativo responsable.
4. A enfermidade que impida a presenza física no centro, debidamente acreditada.
5. O paro académico ou folga doutros colectivos cando impida o acceso ás aulas.
6. A enfermidade grave ou falecemento dun familiar ata o 2º grado, debidamente acreditada.
7. O cumprimento dun deber público, debidamente xustificado.
8. A limitación oficial de mobilidade por inclemencia meteorolóxica ou estado de alerta, alarma ou excepción debidamente declarado.
9. A participación en actividades por parte de deportistas de alto nivel ou de alto rendemento, conforme á normativa autonómica e a da USC.

b) Cando a xustificación sexa considerada apta e suficiente, a falta de asistencia non implicará consecuencias negativas para a avaliación e cualificación do estudantado, debendo concretarse co estudantado os cambios oportunos para a súa realización dentro do período de planificación académica da materia, sempre que sexa posible.

c) **A acreditación da existencia de causa xustificada para a non asistencia a clase deberá realizarse ante a Secretaría Académica da EUTS nun prazo máximo de cinco días hábiles desde que remate a causa que impediu a asistencia.** De existir discrepancia de criterio entre a Secretaría e o/a estudante sobre a acreditación, a decisión final corresponderá á dirección do centro.

d) Entenderanse cumpridas as obrigas de asistencia ás actividades formativas recollidas na programación docente das materias sen necesidade de aportar xustificación, cando a falta de asistencia non supere o 10% das horas programadas, agás nos casos de actividades de realización obrigatoria.

e) Comunicada a xustificación de faltas de asistencia, o/a estudante ten que **poñerse en contacto co profesorado da materia afectada nos 5 días hábiles seguintes.**

Actividades complementarias

Excepcionalmente poderase xustificar a non asistencia a clase pola realización de actividades formativas de interese institucional para a USC ou que complementen a formación transversal ou específica da titulación. A falta de asistencia poderá autorizarse pola Reitoría no caso de

actividades de interese institucional, pola dirección do centro no caso de que se trate de formación transversal ou específica da titulación ou polo profesorado responsable da materia cando se trate de formación relacionada con esta. A ausencia por estas causas non poderá superar o 5% das horas programadas para a materia pero deberá cubrir polo menos unha sesión.

Falta de asistencia a probas de avaliación

a) As causas de xustificación da non asistencia a clase anteriormente mencionadas poderán alegarse tamén para xustificar a falta de asistencia a probas de avaliación, agás no caso de deportistas de alto nivel e alto rendemento no que só se flexibilizará o calendario de exames cando coincida coas competicións e con concentracións e adestramentos de seleccións oficiais, xustificadas mediante certificación da federación deportiva correspondente.

b) De existir causa xustificada o/a estudante terá dereito a realizar a proba noutra data, que se fixará polo profesorado responsable da materia, preferiblemente de forma consensuada co/a estudante afectado/a e sempre con anterioridade á data de peche de actas da correspondente oportunidade. Entre a comunicación da nova data de avaliación e a realización da proba deberá transcorrer, sempre que sexa posible, un mínimo de dous días hábiles.

Estudantado repetidor

Se un ou unha estudante matriculado nunha determinada materia tivese superados os requisitos de asistencia, na programación docente poderase determinar que se someta ao réxime ordinario ou posibilitar que realice actividades específicas para superar a disciplina sen necesidade de acudir a todas as actividades académicas programadas como obrigatorias. Neste último caso recollerase un sistema de avaliación específico.